



## Орган Лемковского Союза

Выходит в каждый четверг.

Редакция и администрация в Крыниці. — Адрес „Лемко“ Крыница.

### Як поднести сельскы господарства.

В часі, коли всі бесідують о лучном труді для общего добра, не от річи буде призадумати ся над тым, як повинно розуміти общу роботу населене села.

Сут ріжны организации рольны и такы, котры лучат ся с сельскым хозяйством и тоты мають на цілі поднести культуру рольну и zorganizовати селян в цілі обороны сельскых інтересов.

В тых рольных организациях находит селянин оборонителя своих інтересов, они дають ему фаховы порады, як має провадити своє господарство, якы землеплоды находят покуп, старають ся о дешевы кредиты для селянина, переводять организации селян и т. д.

Але шобы с землі выдобыти як найбільше користи, треба тоту землю належито обробити и знавозити и до того потребны сут ріжны рольничы знаряды, на котры не стати поодынокого селянина.

Шобы рівномірно розсіяти зерно, потреба сіянника, для выбрана с пасовиска и луку моху надають ся пружиновы бороны и культыватор, для належитого очищення зерна єст потребный триер.

Машины тоты сут дороги, але для рациональной господаркы конечно потребны. Не може собі дозволити на купно тых машин оден господар, але повинны они быти в каждом селі, закуплены с кас громадских або гминных. Машины тоты уживат ся рідко и на короткый час и прото не оплачають ся они одному селянину, але коли с тых машин буде користати ціле село, они барз скоро виплатят ся и принесут користь.

Зрозуміли тоты користи уж гдеякы села, котры с громадских фондів закупають машины рольны. За их приміром повинны ити други и втотчас поднесе ся рольна культура, а с ным также добробыт сел.

Тото само можна сказати о закупі через громады штучных навозов, насія до сіву, лучной продажи землеплодов, основаню склепу, лазні и т. д.

Оден господар не даст рады, але „громада — то великий чоловік“. Она потрафит осягнути величезны результаты, як то маме

примір на селі Лискові, в котром в том році уряджено выставу сельской культуры.

Такым Лисковом може и повинно быти кажде село, бо в каждом селі люде охотно помогут в хосенной роботі, лем треба, шобы кто-си в селі занял ся том роботом.

До того покликаны сут в першой мірі начальники гмин и громад, священники и учителя. На них тяжит обовязок старати ся о культуральне и економичне поднесенє села.

### С села — до міста.

Статистыка переведена в р. 1921. выказала, же населене міст в Польщі выносит 24,6 процент населеня цілою Польщи, а в р. 1931. процент населеня міст поднес ся до 27,2.

С того видно, же прирост населеня в містах росте скорше, чим на селі. Со статистык видно однак дальше, што натуральный прирост людей єст больший на селі, бо там плодность жен єст значнійша и долша. С того нетрудно ся додумати, же населене втіче с села до міста.

Ніт в том нич дивного, бо на селі єст чимраз веце безработных, котры, не находячи занятя у себе в хаті, виїзджають до міст, где все легче найти якунебудь роботу. Не было бы в том ничого злого, бо так само діє ся на цілом світі, если бы не тото, же селянин, виїзджаючи с села до міста, не уміє ниякой фабричной работы и може быти вынаний лем до тяжких и зле платных занять.

Єст то работник невыквалифицированный, найпланьше платный, находячий с трудом занятє, особенно, што промысел в Польщі єст ище слабо розбудованный.

Процес переселеня селян до міста отбывал бы ся безспорно скорше, если бы сельский приходец привозил с собой якийси фонд и мал квалификации до занятя самостоятельного положеня в торговлі, ремеслі або в промыслі.

О гроши на селі трудно, але фаховы квалификации повинны ся дати каждому, кто не має остати на родинном господарстві. Каждый отец повинен старати ся о добро своих дітей и знаючи о том, же всіх не оставит на

господарстві, повинен уж от маленька приготавливати их до торговлі, або ремесла.

Кого стати и кто має діти охотны до науки, най их посылат до школы, инши повинны отдати их до ремесла або до склепу, шобы там научили ся торговлі и ремесла. Добрый коваль, швец, кравец, столяр, чи купец найде в місті все добрый заробок, або стане ся пожиточным для власного села.

Новы тыпы школ вводят также много школ фаховых, до котрых передовсем належит посылати свои діти. Сут то школы, даючи добрый фах, котрый позволит розвинути нам народный промысел и ухоронит село перед перенаселенем.

### Война на Далеком Выході.

Японскы газеты бьют тревогу по поводу громадження кытайских войск в районі Пекина. Агенция „Кокуцу“ подає, же коло Пекина сконцентрировало ся около 250 тысяч кытайских войск и што стяганє войск на тот фронт ище не закончило ся.

Газета „Асахы“, приводячи тоты данны, доносит же скоро коло Пекина начнут громадити ся также червены кытайскы войска. Газета твердит, што маршал Чанг-Кай-Шек уж заключил договор с одним руководителем коммунистичной партии Чанг-Вен-Тау, котрый згодил ся дати Чанг-Кай-Шеку помоч против Японии.

Войска нанкинскы ждуть лем на приказ перейти до атаки против японцов. Напряженє положеня поглубляет ище убийство двоих японцов в Шанхаю. Правда, кытайцы выдали убитых японцам, але настроєне у японских войск єст розярене.

Инши газеты подають, же японский военный штаб пригатовил уж міры к тому, шобы достати от кытайцов належну сатысфакцию.

Последны новости сут того рода, же кытайцы в Шанхаю окопують ся и робят барыкады с мішков, наполненных піском.

Жители инших краєв, котры живут в европейских кварталах, виїзджають до Европы, бо боят ся, же прийде до бомбардованя Шанхая.

В Редакции „Лемка“ в Крыниці можна достати ріжны книжечкы религиозного содержания.

#### Пренумерата в краю:

30 грошей місячно,  
80 „ квартално,  
1.50 „ полрочно,  
3 зл. рочно.

В Америкі: 1 дол. рочно.

В Чехословакии:

2 кор. місячно, 10 кор. полрочно,  
20 кор. рочно.

#### Ціны оголошень:

Ціла сторона 120 зл.,  $\frac{1}{2}$  сторони 60 зл.,  $\frac{1}{4}$  сторони 35 зл.,  $\frac{1}{8}$  стор. 20 зл.,  $\frac{1}{16}$  стор. 10 зл.; оголошеня малы за 1 мм. 20 гр., в тексті 30 гр., перед текстом 40 гр. При місячном и долгом оголошеню значна знижка.

Контото чекове Нр. 404.155.



## Религийна борба в Югославии.

Як відомо, скупщина Югославии утврдила заключений конкордат с Ватыканом. Конкордат викликал ряд протестов со стороны православного населения Югославии.

Найбільше спротивлял ся конкордатови патриарх сербський Варнава, котрый недавно умер и котрого похорон замінив ся в одну величезну манифестацию против правительства и конкордату.

Але и по смерти патриарха-положене не успокоило ся, а наоборот оно ся заостряет. В послідном тыждні в місті Биєлина дошло до кривавого инцидента меже групом православных и жандармеріом.

В часі инцидента пали стрілы от котрых 1 демонстрант был убитый, а другой тяжко раненый. Инцидент тот викликал бывший министр и б. член правительственной партии Янич, котрый помимо приказа, забороняючого уряджати всякы собрания в справі конфликта православной церкви с правительством выголосил в Биєлині побуряющую промову перед толпом, собраним на одной площі.

Янича усунено с правительственной партии за того, же голосовал против конкордату.

## СЕЛО В НІМЕЧЧИНІ.

В Монахию уряджено в том році рольничу выставу, котра ест импонующим показом самовыстарчалности кормовой и науком для селянина, як належит вести свое господарство, шобы вытягнути с грунту як найвысши доходы.

На выставі той находит ся 1-дно поверхний, красний домик в стилью баварском, котрый представлят хату селянина-баварца.

Хата тот містит по одной стороні помешкане селянина, по другой стайні, хлівы, курники и т. д. Всяди много світла и повітря. Хата тот мае быти показом, як належит провадити мале господарство сельске, шобы оно было рациональне, рентовне и ошадно уряджене.

Коло той хаты ест друга, брудна, понура о темных, непровітряных стайнях, в котрых стоить зле откормленный статок. Тот хата мае дійствовати отстрашаючо и ест показом, як не належит провадити господарство.

Коло першой хаты ест загорода с квітем, яринами и сад. Всьо полне зелени и квітя. Побіч фалатки управного поля и луку. На них мае ся селянин научити, як обрабяти землю, шобы вытягнути с ней як найбільши користи. Дальше ест показ мелиорации, осушания мочароватых грунтов и т. д.

Сут там также статистычны табелі обясняючи, килько землі лежить ище отлогом, а также, килько выносит кормовый недобор Німеччины и обчислення, што если бы всі неужиткы використано, то Німеччина, где кормовый недобор выносит ище тепер 17 процент, може по 5-тох літах усиленной работы, ограничити тот недобор до 5 процент.

На выставі ест спеціальний павильон навозов, а также фалатки поля, лук, загород и т. д. в одной части удобренных навозами натуральными и штучными, а в другой части без навозов, где каждый може перекопати ся, як велика ест різниця роста рослин и як важную роль отгравают навозы в сельском господарстві.

Поміщенны статистыкы выказуют, же перед употреблением штучных навозов Німеччина використала лем 86 процент грунту, а тепер под управом ест 98 процент.

Великий павильон машин рольных показуе наглядно, же машина причинят ся до увеличения продукции и щадит силы и час.

На выставі видно также годовлю домашних звирят и показы премиованных звирячих озаков, величезных быков, расовых коней и коров. В отдільных поміщенях сут кролики и домашны птахи. Дальше рационально веде-

## Як живут селяне в Финляндии.

Финляндия — то край величины Польши, в котром живе около 3,5 милиона людей. Ест отже барз рідко населена.

Там встрічат ся хлопа, котрый мае и до 2.000 гектаров землі, сам оре, сіе, вывозит навоз на поле и не стыдат ся жадной работы. Крім того Финляндия знана ест с образцовой чистоты, а также и с того, же там жаден хлоп не обходит ся без газет и без радио.

Шляхты в Финляндии ест мало, зрештом живе она так само, як и селяне. В хатах сут звычайно помальованы дылины, выложены дыванами власного výroбу, стіны чисты, украшены образами. Всяди чистота и порядок аж бют в очи.

Коло каждой хаты, аж и найбіднійшой, ест лазня, побудована отдільно. Ест то своего рода святыня, и ест не до подуманья, шобы кто-си не мал лазні. Такой стал бы ся посміхоиском цілого села и наразил бы ся на товариский бойкот.

Лазня там ест усеячена традициом таксамо, як неділене грунтово. Там ціле господарство по отці достае найстарший сын, а молодши діти достають фахове образование и такой сплат, котрый не приносит шкоды для господарства.

Звычай тот повстал перед віками и заховавал ся дотепер. Прото тыж грунт ест там нероздробленный и стан посіданья не змінят ся праві цілковито.

**Червены мечи на небі.** Перед пару днями недалеко Иноероцлава появила ся на небі біла смуга світла, а пак два мечи барвы червено-фиолетовой, а меже нима недалеко місяця огнистый столб. Образ тот тревал около 10 минут и зробил глубоке вражене на місцевом населенію.

на пасіка и отдільный павильон „Здорове сельске населеніе”, представляющий наглядно гигиену тіла и штоденного житя.

На конци выставки ест басен до плыванья, котрый в коротком часі мае находити ся в каждом німецком селі.

о: Д. В.

## Из твореній св. Іоанна Дамаскина

ИЗ ЯСНЕНІЕ ДОГМАТА ГЛАСА ПЯТОГО.

(Докончене).

Найближе до християнства был зближенный греческий философ Аристотель. Его письмами послуговал ся св. Тома з Аквину до своих засад так звн. школы схоластичной. Але и Аристотель а головно его ученики звани перипатетиками перемѣнили ся з часом в скептиков т. е. людей которы суживают ся не только о истнованію Бога але навѣть о своим власном истнованію.

Сам Плято философ греческий, яко поганин высказал, що розум людскій не выстарчае там где идет о означеніе отношенія человека до Бога, хотяи признаем, що цѣлю человека на земли мае быти удосконаленіе себе на взор божества.

Так то отже розум людскій оказал ся безсильным в откритію правды и науцѣ добра. Погибель людска была неминуема. Но в такое время послал Бог людем спасеніе, там где они того наименше сподѣвались.

Бѣдной Дѣвицѣ Маріи возвѣщено было, що из Ней народит ся Спаситель свѣта, котрый побѣдит грѣх и соединит людей с Богом.

Тепер уже понятны нам будут слова догмата: „В чермнѣм мори неискособрачныя Невѣсти образ написася иногда”. Но идѣм дальше.

**II. Тамо Мойсей раздѣлитель воды, здѣ же Гавріил служитель чудесе:** В хвилю когда фараон с войском и колесницами гнал напротив Израилтян — над червоним морем стоял вожд и законодатель св. Мойсей враз с замирающим зо страху Израилем. Мойсей сам не знал що мае дѣлати, но яко муж крѣпко вѣрующій в Бога, не подѣлял он страху своих собратей противно говорил им: „не бойтесь — Господь явит вам спасеніе”.

И дѣйствительно тое спасеніе пришло як то выше было описано. Подобным образом и находящему ся над крайнею грѣховною пропастью роду людскому возвѣщено было спасеніе Арх. Гавріилом одним из 7 архангелов.

Арх. Гавріил не знал яким способом прийдет спасеніе роду людскому, но подобно як Мойсей он крѣпко вѣровал, що Господь спасет людей. И за тую то крѣпкую его вѣру, вы-

брал его Господь и послал до мѣсточка Назарета благовѣстити Прсв. Дѣвѣ.

Тою крѣпкою вѣрою розсѣял он даже сомнѣніе Прсв. Дѣвы; — коли она вопросила: „како будет сіе идѣже мужа не знаю” заявил ей Архангел непохитно, що тое совершит ся всемогуществом Бога.

Так отже каждый ясно видит тут сходство между обома избранниками Божиими Мойсеем и Арх. Гавріилом.

**III. Дальшиі слова догмата: Тогда глубину шествова немокрено из Израиль — нывѣже роди Хрѣста безсѣменно Дѣва.**

В том пассауѣ (положенію) наибольшое значеніе имѣют яко поровнаніе слова: немокрено — и безсѣменно (без содѣйствія мужа). Когда Мойсей ударил жезлом по водѣ и море розступилось — а вѣтер осушил его дно, могли Израилтяне дѣйствительно „немокрено” т. е. не замочивши собѣ ног, сухими стопами, перейти на другой берег.

Подобным способом, когда только Арх. Гавріил благовѣстил Прсв. Дѣвѣ, она в тойже сам час приняла в утробу свою Божого Сына, котрый тамже приоблек ся в плоть (тѣло) человеческу. Так отже Прч. Дѣва почала Божого Сына „безсѣменно” — без участи мужины, а стало ся тое дѣйствіем св. Духа, як сказал



# Закладайме сады.

У нас рішительно за мало увагы звертат ся на сады. Коло хаты ест яблонь, або грушка, але лем пото, штобы діти мали розрывку, але штобы заняты ся закладанем садов в векших розмірах, на тото ніт у нас охоты.

А преця сады могут стати ся поважным жерелом доходов наших господарств. Не правда ест, якобы горы не надавали ся до закладання садов. Гористый и высоко положеный Тыроль высылат свои яблока в далеки край и овочи тоты тішат ся світовом славом. Также и наши подкарпатскы овочи купуют охотно купцы, бо яблока с тых сторон меньше гниют и дают ся лучше перевозити.

С того видно, же по наших селах можна всяди без рызыка закладати сады, лем треба выберати при яблоках отміны вчасны, літущны, бо в горах робит ся весна позднійше, а осенны зимна приходять вчаснійше — ест отже коротший час вегетацийный и отміны поздны, зимущны не могут ся належито розрости и дозріти.

Сады повинни закладати передовсем тоты селяне, котры при великом числі робочих рук мают недуже грунту, бо сады дают много работы, але при роботі также и добры доходы.

В Польщі ест на загал мало садов. Статистыка выказує, же занимают они 552 тысячи га. (2 процент управного грунту). Число овочевых дерев обчислят ся на яких 16 миллионов, отже на 1-го человека припадат  $\frac{1}{2}$  овочевого дерева, коли в Німеччині пропорция тота ест 4 разы высша.

Прото нич дивного, же до Польщи спроваджат ся каждого року за десятки миллионов овочей и то не лем полудневых, але и яблок, грушок и сливок, котры удают ся знаменито у нас. Тото послідне обстоятельство дає нам гваранцію, же каждый садовник найде все охотного отберателя на выпродукованы овочи и же садоводство може принести селам поважны доходы.

Принимаючи, што ціна гуртовна, яку платят посередники в садах, выносит около 20 зл.

за 1 сотнар, доходы с одного гектара засаженной овочевыми деревьями землі выносят от 500 до 600 зл. Ани зерно, ани картофлі такого доходу дати не могут. В торговлі ціна овочей ест значно высша, не раз 2 до 10 разов. Тоту ріжницу цін заробят посередник.

Если бы садовник занял ся сам не лем плеканем саду и овочей, але также зберанем, сортованем, упаковком и пересылком овочей, доходы с садов могли бы быти значно высши, бо часть зыску посередника оставала бы в руках продуцента. Втотчас легко дойти и до 1.000 зл. доходу с 1-го гектара землі оберненой на сад.

Цыфры тоты доказуют, же садоводство повинно заинтересовати найширши круги нашего селянства. Штобы однак сад давал добры доходы треба:

- 1) выбрати отвітне для саду місце,
- 2) выбрати отвітны гатунки овочей,
- 3) в одном саді, а ище лучше в цілом селі плекати лем оден гатунок яблок,
- 4) старанно плекати сады и чистити деревья.

Місце под сад не ест легко выбрати. В каждом селі сут ріжны климатичны базы. Сут там місца наставлены до сонца, без вітров и місца звернены до полночи и продувны. Деревя овочевы любят затишину о сонечном положеню и тому, где лем грунт, котрый повинен быти дост глубокий, позвалят на тото, на таких місцах належит закладати сады.

Уникати положеня над ріками, а также на вершках гор, бо там часто любят хапати поздны морозы, котры в горах появляють ся не раз в другой половині мая, або и на початку череня. Найлучше надають ся половины горских убочей, звернены до сонца.

Если сад має быти перезначеный на торговлю, то найлучше садити в нем оден гатунок овочей н. пр. яблок, бо втотчас має ся тых яблок много и легче найти доброго купца.

Ище лучше, коли в цілом селі ест оден гатунок яблок, бо втотчас можна уж высыла-

ти яблока вагонами в світ, притом ест значно легче сортовати овочи. Здоровы, дородны овочи продає ся, а с дробных можна робити мармеляды, повила, вина, або сушити.

Закладане садов ест важне также и с того взгляду, же у нас населеніе іст на загал за мало овочей, а преця овочи, містят в собі витаминны, котры сут конечно потребны для удержаня сил нашего организма.

Наближат ся осень и с нѣм и найлучша пора садженя овочевых деревьев. Заряды громадскы повинни представити людям користи выплываючи с садоводства, заохотити их до закладання садов и зберати замовленя, штобы по возможности в одном селі мати немного гатунков овочей.

## Воздушны маневры в Англии.

В часі воздушных маневров роблено пробу бомбардованя Лондона. С высоты 3.500 метров припущено 30 налетов бомбовозов, котры бомбардовали докы Тильбюри и склад нафты Темиз-Хавен.

Оба тоты пункты были теорытично знищены. Атмосферичны условия для противвоздушной обороны были барз добры и прото половина нападающих самолетов мусіла отступити.

## Бои в Испании.

Послідный тыждень перешол без великих боев. На центральном фронті атака повстанцов была отперта с втратами противника. Республиканскы войска уллучили свои позиции.

Коло Сарагосы правительственны самолеты бомбардовали позиции противника и нанесли ему втраты.

В Астурии отнесли правительственны войска незначну побіду над войсками ген. Франко.

Арх. Гавріил: „Дух св. найдет на Тя и сила Вышняго осѣнит Тя“.

Дух св. которого называемо источником жизни, як в молитвѣ кажем: „жизни подателю“, который на початку творенія свѣта уносил ся „верху вод“ и вдыхал житіе во всѣ творенія Божіи — тойже Дух св. здѣлал тепер и тое, що незнаючи мужа Прч. Дѣва, родила безсѣменно Сына; — так безсѣменно, чудесно, як чудесно Израилтяне перешли черв. море сухими ногами (немокрено).

**IV. Море по прошествіи Израилевѣ пребысть непроходно, Непорочная по рождествѣ Еммануилевѣ пребысть нетлѣнна:** Только для одних Израилтян, один раз совершилось такое чудо, що они прошли немокренно черв. море.

Фараон гонившій с воинством, дошел только до половины, бо стоячій уже на другом березѣ Мойсей, ударил жезлом по водѣ и море опять соединилось потаплиючи в своих волнах Фараона и конницу его и колесницы его. От того часу дотепер николи больше черв. море не открылось.

Тая то непроходимость червонного моря, ест и образом Богоматери Маріи всегдашней Дѣвы, — як тое выражає богородичен воскресен 7 гласа: „Яже прежде рождества Дѣва, и во рождествѣ Дѣва и по рождествѣ паки пре-

бываеши Дѣва“, як червн. море непроходимое перед Израилтянами, осталось непроходимое и послѣ их чудесного перехода.

И старозавѣтным Израилтяне в той непроходимости червн. моря, могли догадыватись всегдашнего дѣства Богоматери, як тое выразно сказал пророк Исаія: „Се Дѣва во чревѣ приймет и родит сына и нарекут ему имя Еммануил, еже естъ сказаемо с нами Бог“.

**V. Догмат кончит ся словами: „Сый и прежде Сый, явлей ся яко человекъ Боже помилуй нас“.** Тут маем новое имя Христа Спасителя: „Сый и прежде Сый“ т. е. всегда истнующій, живущій, который был, ест и будет.

Тым именем назвал себе Г. Бог впервые, когда явил ся Мойсею в горѣющем корчѣ, из которого он послышал глас: „Аз есмь Сый“. Тым именем называл себе Г. Бог, когда являлся старозавѣтным пророкам, и так казал Себе называти.

В еврейском языкѣ тое имя гласит „Иегова“. Жиды вымавляли тое имя рѣдко и то всегда с страхом и трепетом, сознаючи що Божество естъ недоступне для людей.

Но тепер мы можем тое имя смѣло произнести и всегда просити Суцого и прежде суцого о помылованіе. Длaczego? Бо Он явил ся нам яко человекъ — понизил Себе до того,

що принял плоть человекеску и сам осмѣляет нас звати к Себѣ „Авва Отче“. А за тое все обязаны есмы Прч. Дѣвѣ Маріи, от которой Бог принял плоть и сам называл Ею Матерью.

Так то розобранный нами догмат — поучает нас много — он учит нас о Благовѣщенію Прсв. Дѣвы Архангелом Гавріилом — о чудесном рождествѣ от ней Христа Спасителя без мужа, силою св. Духа, и о всегдашнем Дѣвствѣ Богоматери и до рожденія и по рождествѣ Спасителя.

Того всего учила и учит всегда св. Церков, и выражена в догматѣ св. Іоанном Дамаскином тая наука, доказует нам як добрым и вѣрным был он сыном Церкви св. — як ученым богословом доказавшим нам правды тіи на подставѣ старозавѣтных, событий, що все разом сложил в прекрасну церковну пѣснь, котора от его часов до нынѣ лунает по наших св. Церквах.

Слова глубокого содержания, приоблечены в пѣснь церковну, обнаружат не только глубоку и важну науку, але дают и житіе духа и розкрывают тоту неоцѣнену красу и велич нашего св. восточного обряда — который достойным естъ того, щобысмы любили и дорожили ним так, як дорожимо нашим житіем и счастьем.



## Вісти с краю і со світа.

**Соқыром забил трое дітей и ранил жену.** В Бічі недалеко Горлиц уметвенно хворый Францишек Гаецки в приступі атаку шалу убил трое власных дітей: 2-літнього Михаила, 3-літню Софию и 6-літню Анну, а 5-літнього сынка и жену тяжко поранил.

Ошалілого арестовано и поміщено в арестах окружн. суда в Яслі.

**Шимпансы утекли с клиники.** С одной клиники в Неаполю уткло парунадцет шимпансов (малп), котры там держано в цілях переведеня на них науковых експериментов. Звірята схоронили ся в королевском парку Кампо Бимонто и укрыли ся в гущавині.

Помимо парукратных нагонок, шимпансов не потрафили зловити. Маса цікавых приходить до парку, штобы увидіти малпы. Власти полицийны и служба зоологичного саду твердят, же малпы не опустят парку.

Заряд клиники оцінят свою втрату на поважны сумы.

**Трагична борба человека с волком.** На пависовиску недалеко села Усте в пов. костопольском Михаил Галяс пас кырдель громадских овец. Нагло выбіжал волк, котрый шмарил ся на одного барана и почал го дусити.

Галяс напал на волка с сукатым кыем и почала ся борба на смерть и жыте. Отважному пастухови волк покалічил так сильно ногу, же мусіли му ю в иниталі отрізати, а волка, котрый ушол до ліса, нашли на другой день неживого.

**Утонул корабель и 200 людей.** В Маракайбском заливі затонул моторный корабель „Анна Цецилия”. На палубі корабля находило ся 200 людей. Лем малу часть людей урадовано, а решта утопила ся.

**Выборы цыганского президента.** Велику сенсацию выкликала вість о новом выборі вождя цыганского через цыганов, котры несут вдоволены выбором короля Квека. Выборы мают ся odbyти с великом парадом, причом характерыстичне ест того, же выбирают не короля, але президента.

Около 3 тысячи цыганов мае приіхати на выборы. Уж тепер вычисляют яко найповажнійшого кандидата на президента сына помершого трагично короля Квека, — 17-літнього Василия, котрый тішит ся великим поважанем серед цыганов. Сут также и инши претенденты.

В цілі переведеня елекцийных формальностей приіхало уж 15 возов со старшином, а за нима приїзджают дальши таборы.

**Пчолы зажалили на смерть боцаны.** Коло Баранович рой пчол осіл на дереві, на котром гніздили ся боцаны. Птахи шмарили ся на пчолы, але пожалены утекли назад до гнізда. Втотчас пчолы шмарили ся на гніздо. Стары боцаны утекли, а молоды пчолы зажалили на смерть.

**Помстила ся.** В незвыклый способ помстила ся одна баба в Болгарии на своем невірном мужі. Спостерегла она, же муж живе в занадто добрых отношениях с одним бабом с сусідного села.

Хотячи зловити мужа на невірности, сказала она ему, же виїзджат до своих родичей до Білграду. Вмісто до Білграду пошла она до саду своей рывальки и там скрыла ся, а коли ей муж ввошол до хаты, шмарила она через вигляд два кошиковы ули с пчолами.

Пчолы пожалили так сильно любовну пару, же мало што непоумерали. Бабу арестовано.

**Гроши в жолудку куры.** Жителька Пыздр коло Познаня купила на торзі куру, котру зарізала. В жолудку куры нашла она 11 монет по 10 гр. и 4 штуки по 2 гр. Монеты были уж без рисунку, видно уж долший час находили ся в жолудку куры.

**Ловы на чорта.** В одном тибетанском місті (Азия) отбыват ся кожного року цікава церемония. Сут то ловы на чорта.

На площі перед святиньом зберат ся ціле населене міста под председательством достойников світеких и духовных. В „логах” принимают участь монахи и воякы. Выглядат того забавно.

На переді біжит монах, несучи фигуру чорта, а Великий Жрец жене за ним со штылетом в руках. По якомси часі Жрец доганят монаха, пробиват куклу, котру с триумфом заносят и палят на кострі.

Усчастливленный народ радуе ся пак и танцуе до поздной ночи.

**Выросли зубы 100-літнему старцеви.** В канадийском місті Гамльтон еден старик Мардинос Татоян обходил торжественно 108 рочницу своих уродин. Того для был выключно счастливый. Перед трьома роками вырвано ему послідны зубы, а тепер почув, же с ясел выходят ему новы зубы. Татоян ест споходження турком. В Канаді живе уж 35 літ. Тепер сїхало ся до него много лікарей, котры слідят незвычайный случай.

**Штучна вылягарня ластивок.** Остия в Италии мае так много комаров, же предпринято с нима энергичну борбу при помочи ластивок, бо тот натуральный способ оказал ся найпрактичнійший.

В той цілі заложено там штучны вылягарні ластивок, в котрых выводят ся пташкы так далеко освоены, же прилітают, коли ся на них засвище. Ластиекы чуют ся добре, бо мают што жертвы.

**Псы, котры не брешут.** В Лондоні на выставі псов показано нову породу німых псов, котры николи не брешут. (Чи тыж нашол бы такого человека? приміч. складача). Гатунок тот походить с Африкы, где автохтоны называют их „бассенгами” (тутешныма) штобы их отличити от европейских. Сут они незвыкло отважны и біжат барз скоро. Прото уживают их при ловах на хищны звіры.

## Замах на Ворошилова.

Надышли с Москвы вісти подают, же доконано замаху на маршала Ворошилова.

Дня 14. липня т. р. маршал Ворошилов разом с делегациом специалистов приіхал до міста Тулы в цілі переведеня люстрации в тамтешной фабрыці оружия. Поїзд приіхал о год. 10. вечером. На дворці привитала маршала делегация работников и представителей армии.

В часі бесіды маршала Ворошилова с делегациями, пал нагло револьверный стріл, котрый мал ранити Ворошилова в ліве бедро.

По уділеню першой помочи перевезено маршала слідуючого дня самолетом до Москвы.

Власти старают ся задержати замах в тайні. Переводят численны ревизии и аресты серед работников. До той поры, як твердят, серед арестованных ніт виновных замаху.

### СПРОСТОВАНЕ.

Повідомляємо П. Т. Членов Руской Бурсы в Горлицах, што обще собрание членов той бурсы отбуде ся **не 26. серпня**, як мы в попередном числі „Лемка” оголосили, а

**в неділю дня 29. серпня 1937. о год. 12-ой в полудне.**

Если бы о год. 12-ой не явило ся приписане статутум число членов, то обще собрание отбуде ся того самого дня о год. 13-ой без взгляда на число присутных.

**Правлене Руской Бурсы в Горлицах.**

### КУРС ПЕРЕДІЛКИ ОВОЧЕЙ В КРЫНИЦІ.

В вересні т. р. отбуде ся в Крыниці - Селі в поміщені старой школы 3-ох дневный **курс переділки овощей**. Курс обойме науку повия, соков, мармеляд, консерв, вина и т. д.

Курсанткы оплачают по 50 грошей и приносят свой цукор и овощи для переділки.

Права первенства принятя на курс мают тоты, котры окончили в зимі курс домашнего господарства в Крыниці.

Зголошеня принимают админист. „Лемка” до 25. серпня 1937.

**Продам добре загосподаровану пасіку.** Звертати ся до заряду школы народной в Мохначці Выжной почта Тылич, повіт Новый Санч.

КТО ХОЧЕ ЗАБЕЗПЕЧИТИ СЕБЕ НА СТАРОСТЬ И РОДИНУ  
ОТ НУЖДЫ И ГОЛОДА, АБО ЗЛОЖИТИ ДІТЯМ ВІНО,

НЕХАЙ ЯКНАЙСКОРШЕ

**за асекуруе ся  
в асекурацийном Товаристві  
ВИТА И КРАКОВСКЕ  
во ЛЬВОВІ**

Асекурацию принимают на цілой Лемковщині  
представители: гг. Осиф Ямовицкий — Крыница - Село  
и Михаил Перелом — Сянок.